

你信任啥人？

「有雅各 ê 上帝做伊 ê 幫助 ê 人有福氣！」

(《全民台語聖經》詩篇 146：5)

Tī 咱 ê 生活中，甚至咱 siōng 親 siōng 疼 ê 人 kah siōng 信任 ê 朋友 mā bē-tàng 提供咱一個堅定 ê 基礎，因為 bē-tàng 按算 ê 情況 tiān-tiān 會來干涉。He tòh 是為啥物 chit 節詩篇會催促咱 tiòh 仰望上帝；祂是一個永遠存在，無所不知 ê 同伴，祂 ê 計畫永遠 bē 滅無。若是咱 teh 走 chhōe 一個信心 ê 倉庫，就是咱 ē-tàng 信靠 ê，án-ne，咱必須 tiòh 仰望上帝，就是宇宙 ê 創造者，mā 是賞賜咱活命 ê。

真不幸 ê 是，咱 tiān-tiān 無 beh 轉向上帝；咱顛倒去信任 hiah-ê 政客，á 是銀行家，á 是 seng-lí 同伴，á 是家庭成員。咱若轉向金錢，講：「若是我 ē-tàng 中 (tiòng) tiòh hit-ê 樂透彩，贏 tiòh 五百萬美金，án-ne，我所有 ê 麻煩 tòh 會過去。」M̄-koh，hiah-ê lóng 是虛假 ê òng 望。

一 koá tī 美國 ê 大好額 ê 人，in 靠 poaⁿ 電影，á 是錄唱片，á 是 phah 各種球類運動，一年 thàn 幾百萬美金，m̄-koh，in 往往會變成沉迷 tī 毒品 á 是酒精，致使受關監 á 是無家可歸。有 ê 人會因為 in ê 錯誤行為，soah 喪失 in ê 家庭 á 是聲望。這應該會 hō 咱警醒。

咱往往想講金錢 kah 名聲，以及別人 ê 扶 thán 會 hō 咱快樂，m̄-koh，咱會漸漸了解 hiah-ê 並 m̄ 是成功 ê 真正基礎。物質 ê 物件往往會 hō 咱失望，甚至(可能尤其是) hiah-ê 做出過頭承諾 ê mā 是 án-ne。M̄-koh，上帝永遠 bē án-ne。

聖經 ê 話迫切要求咱 tiòh 先轉向上帝，並且 tiòh 信靠基督。聖經有好 ê 理由 thang án-ne 講：「祂保守信實到 tī 永遠。」(詩篇 146：6)。其他有啥人 ē-tàng 做出 chit 種驚人 ê 宣告？Á 是 koh khah 準確來講，其他有啥人 ē-tàng 實現 chit 種應允？

祈禱：上帝 ah，求祢幫助我 koh khah 清楚看出，只有祢真正是我 òng 望 ê 基礎。當生活 hō 我厭倦無氣力，soah 感覺被放 sak ê 時，求祢 hō 我有祢 kah 我同在 ê 堅定信念，tùi chit-má 到永遠。而且，主 ah，求祢 hō 我 ē-tàng kah 其他 ê 人分享 chit-ê 好消息，hō in mā ē-tàng 仰望祢。我奉耶穌 ê 名祈禱。阿們。

(1995.12.17)